

# MANCUL FUFIGNIS

Al siôr M.

M., no ti cognossevi prin des cunvignis di Vençon. Dome par sintût a dî: tanc' a disevin un ben che mai di te e âtris a disevin ogni sorte di mâl. Par dovê di cussiense, o ài volût fâ come san Tomâs: provâ di persone ce che tu eris.

Dopo di chestis riunions, che àn vût il lor moment plui alt a Tresesin, o ài podût tirâ lis somis e o soi rivât `e conclusion ch'a vevin reson chêi e chêi. Di te si pò di ben e mâl, ma par ledrôs. Ben par cont di bausiis, mâl par cont di veretâz; bulo par fufignâ e mîsar in tal quartâ indenant alc di sest.

Ancje la idèe de U.P.F. no jè tô. Le à tirade fûr pre Checo. Tù tu sês rivât dome a pastrocjà parsore. Tu âs volût fâ il grant «regjst» ma il risultât al è stât deludent che mai.

Ti mancjn lis cualitâz.

Prin di dut l'onestât, che par furlan si dis cussiense. Al è dibant fâ discorsone di alte mistiche unitarie cuanche dopo tu sistemis i tiei e tu scancelis cheâtris cence nancje indegnâti di visâ chêi che tu eris dacordo. Tu âs batût cun tune religjon ch'al ere di restâ a sintîti: no si à di fâ cuistions di personis, il ben de idèe al à di lâ denant dai nons, si à di fâ un salt di cualitât e vie. Intant il salt tu lu às fat fâ a di cheâtris butanju fûr pal barcon, âtrichè sacrificâsi pe patrie!

Ti mancje ancje clarece. Cuanche tu ti cjatis denant di int che dis pan al pan e vin al vin, tu restis sconsortât, no tu sâs ce bande balinâ, tu ti rinpînis te stratosfere. In pratiche, però, tu fâs i tiei zugùs; zucs di frut, parceche tu ju fâs masse palês. Il to ambient e jè la fufigne, il cunbinament a pan e formadi, il comedâ dut staronzant di ogni bande. No tu sâs ce che jè la veretât. Tu vâs indenant a madrac vie o, se t'ûs, a gjesuît vie. No jè une usance furlane.

E po' no tu âs memorie. Pò staj che no seti colpe tô. La memorie, come l'inteligjense, a son dons, e dome Diu al dà la tele. Però, se un nol ten amens, al pò sinpri cjapâ note, e riferî come che son stadis lis robis e no cemût ch'al pâr e plâs tradint ogni peraule dade. Se, par esenpli, a Vençon and'è siet puesc', no podin diventâ doi a Tresesin. Se un ti dâ un non e tù tu lu acetis, no tu âs di dismenteâlu pe strade biel che tu vâs a riferî a di chêi che l'an passât o eris neutros e cumò o veis fate frae.

Cun dut chest, però, o stoi ai paz, seben che tû tu às mancjât di peraule. E no stoi par te, ma pe int ch'a è dongje di te e ch'a no smicje a diventâ un Bismarck in scjale ridote.

Par tante int che votarâ cheste Union Popolâr, il taramot e jè stade e a reste une tragjedië, une disgracie che pò diventâ une copete. No une ocasion di fâsi strade. Al è brut metisi in lûs su lis maseriis di Vençon. Nol è just, nol va ben e nol conven. Al sa di chêi nemâi ch'a rاسبin tai vuess. No sai cemût che si dîs par furlan, ma no son ninîns un lafé nuje.

Salacôr si cjatarin ancjmò, ma mi insegnarai cu la man çanpe e mi puartara sinpri testimonis. Ancje se un ch'ai è bausâr di pendense, si sbonbe di testimonis e di peraulis e di dut. E ancjmò, dopo di vêlis moladis, al è bon di vuicâ par che cualchi sturnel al crodi ch'ai seti stât lui a cjapâlis e no a dalis.

Mandi.

Mai 1979

pre Antoni Beline